

Isishwankathelo seSigqeba (isiXhosa)

Imbali yaseMzantsi Afrika yeenkonzo zosasazo ibonakalisa iintanda noqhekeko entlalweni, ndawonye nakulwabiwo lwamandla. Umceli-mngeni wenguqu yedemokhrasi uchaphazela wonke amacandelo entlalo, kubandakanywa amaziko kunye neenkqubo zeenkonzozo zosasazo.

Urhulumente uzimisele ekusekeni i-arhente yokuphakamisa ukufikelela kwabo bangahoyekanga kwiinkonzozo zosasazo kunye nokuphakamisa ukuphangalala kweenkonzo zosasazo. Oku kulandela isigqibo seKhabhinethi esisekelwe kwiziphakamiso ze-Comtask ngo 1996. Oku kuhambisana noMgaqo-siseko, uMqulu waMalungelo, kunye neNkqubo yoKwakha Ngokutsha noPhuhliso, yaye kukwakhuthazwa siSicwangciso seLizwe sokuThabatha aManyathelo okuPhakamisa nokuKhusela aMalungelo oLuntu, esigxininisa inkululeko yokuvakaliso izimvo kunye nokuphangalala kweenkonzo zosasazo, kunye nemfuneko yeendlela zokuqinisekisa ukuba oku kuyafezekiswa. Oku kulandela iinzame ezaphanzayo zasekuhlaleni zokuseka elo qumrhu kwiminyaka yokuqala yango 1990.

Inkuthazo yokuseka i-Arhente yoPhuhliso nokuPhangalala kweenkonzo zoSasazo, i-Media Development and Diversity Agency (MDDA), ilele kwimfuneko yequmrhu leengcaphephe zeenkonzozo zosasazo kunye noosaziwayo, eliyakuvelisa ubungcali kuphuhliso nokuphangalala kweenkonzo zosasazo, kwaye liqinisekise ukufezekiswa kwazo, ngokunika inkxaso-mali, ukuphambela inkqubela kunye nophando. Eli qumrhu liyakusebenza ngokweyona mimiselo iphambili yolawulo lobumbano kwaye libenemimiselo yokuthunywa kunye nezinto ezifunekayo. Liyakusebenza qelele kurhulumente, kwishishini leenkonzozo zosasazo kunye nabanye abaxhasi.

Njengoko ilizwe likekelela ngamandla kwintlalo yenkcazelo nolwazi, kungundoqo ukuba bonke abemi babenako ukufikelela kuluhlu oluphangeleleyo lwenkcazelo nezimvo ukuze bathabathe inxaxheba ngokupheleleyo kwilizwe eliya lihlangu ngamandla kumanqanaba endawo, awelizwe nawehlabathi. Ukufikelela kwinkcazelo kungundoqo kwinkqubo karhulumente yokwakha ngokutsha nophuhliso.

I-MDDA, njengenkqubo yee-Multi-Purpose Community Centres, linyathelo elingundoqo elikhokelela kule njongo. Iyakunceda iguqule imo yonxibelelwano ngendlela eyakha ubuxhakaxhaka nephembelela ukuvela kweenkonzo zosasazo ezibonisa amava kunye neembono zabo bangahoyekanga. Ngamanye amazwi, nangona nje i-MDDA ingeke yona ngokwayo izise inguquko ephelileyo yeenkonzo zosasazo, iyakudlala indima evuthelayo ekuguquleni ubume beenkonzo zosasazo ngendlela eyakuvumela iinguqu ezibanzi, ngokunika inkxaso-mali, ngokuphambela inkqubela kunye nangemisebenzi yophando.

Ukuchaza uphuhliso nokuphangalala kweenkonzo zosasazo:

Uphuhliso lweenkonzo zosasazo lubandakanya ukuphakamisa imo evumayo yokunceda ekulungiseni ukungabandakanywa kunye nokungahoywa ekufikeleleni kwiinkonzozo zosasazo – njengabanikazi, abaphathi kunye nabavelisi beenkonzo zosasazo. Ukuphangalala kweenkonzo zosasazo kukuqinisekisa ukuba onke amacandelo kunye

nabo babandakanyekayo banako ukufikelela kwiindidi ezahlukeneyo zezimvo kunye namaziko enkcazelo abonisa intlalo yethu ngokupheleleyo.

Ukufezekiswa kokuphangalala kukwaphenjlelwa kukufumaneka kweendlela zokusasaza kwiinkonzo ngeenkonzo eziphangaleleyo zosasazo, ezincinane nezinkulu.

Iinkonzo zosasazo eMzantsi Afrika:

Nangona nje kukuninzi esele kwenziwe ukusukela ngoko kwavela idemokhrasi ukuze kujongwane neengxaki zophuhliso nokuphangalala kweenkonzo zosasazo, kucacile ukuba oku khangane kwanele. Ukushinyana kobuxhakaxhaka beenkonzo zosasazo ngokomlinganiselo, kusephantsi. Ubunikazi beenkonzo zosasazo busahlanganiswe ndawonye kwaye abuzifzekisi iimfuno zabo bebonke abo babandakanyekayo. Ukumelwa kwabantu bebonke akwanelanga kumanqanaba okuphatha, okuhlela nakwisitafu ngokubanzi.

Amava aseMzantsi Afrika abonisile ukuba imifutho yemarike, amathuba eelayisensi zokusasaza kunye neenguqu kubunikazi, nangona nje le miba ibalulekile, ayinako yona ngokwayo ukufezekisa le nguqu ngokupheleleyo. Amanyathelo afana ne-MDDA ayimfuneko ukuze kuqhutyelwe phambili ngale nkqubo.

Ukufunxa kumava:

Amava ehlabathi abonisa ukuba amaqumrhu enkxaso okuphakamisa uphuhliso kunye nokuphangalala kweenkonzo zosasazo asiyonto entsha. Ake asetyenziswa phaya eYurophu ukusukela ngeminyaka ka 1950 ngokusekelwe kuluvo lokuba imifutho yemarike yona ngokwayo ayinako ukufezekisa ukuphangalala okwaneleyo. Ngokwenyani, ubungqina bobokuba, imarike yona ngokwayo idla ngokukekelela kuqokelelwano olungamandla, nto leyo engathintela inkululeko yokuvakalisa izimvo kunye nezimvo eziphangaleleyo.

Iinzame zokuqala zokuseka iqumrhu lenkxaso lokuzithandela, i-Independent Media Diversity Trust, laphanza ngenxa yokungabikho kwenkxaso-mali. Oku kuqinise izimvo zokuba, ngamanyathelo amiliselwe ngokuqinileyo kwintsebenziswano yorhulumente neenkonzo zosasazo, kwaye aqhutyoshwe ligunya lomthetho, ayakuba negalelo elizinzisekayo.

Imbonakalo neempawu ze-MDDA kunye nobudlelwane bayo namanye amaqumrhu:

I-MDDA iyakuba liqumrhu elizimeleyo, elimiswe ngokomthetho wombuso, nelisebenza qelele kurhulumente, icandelo elizimeleyo kunye nabaphina abaxhasi. Umsebenzi eyakuwuthunywa iyakuba kukuphakamisa ukuphangalala nophuhliso kwiinkonzo zosasazo ezishicilelayo, ezisasazayo kunye “neenkonzo zosasazo ezintsha”.

I-MDDA iyakuba neBhodi yabantu abalithoba abakhethwe yiPalamente ngokwenkqubo yasesidlangalaleni, baze ke batyunjwe nguMongameli. Abachongwa bakarhulumente, abeenkonzo zosasazo ezishicilelayo, iinkonzo ezisasazayo kunye neenkonzo zosasazo zabahlali, bayakubekelwa iindawo kwiBhodi, ngelilixa abahlanu bayakutyunjwa luluntu.

Ibhodi iyakubeka iGosa leSigqeba eliyiNtloko (CEO), lona eliyakuthi, ngokubonisana neBhodi, lityumbe isitafu esimbalwa esinezakhono eziphezulu kwaye esinezinto ezaneleyo zokusebenza.

Ngaphezulu kwendima yayo esisiseko yokuxhasa iinkonzo zosasazo, i-MDDA iyakuthumela ukwenziwa kophando kwaye yenze iziphakamiso kurhulumente, ishishini losasazo kunye namanye amaqumrhu afanelekileyo. I-MDDA iyakunxulumana nawo wonke amaqumrhu abandakanyeka nkqo nangabandakanyeki nkqo kuphuhliso nokuphangalala kweenkonzo zosasazo. I-MDDA iyakubamba intlanganiso yabo bonke abandakanyekayo, qho ngonyaka, apho ke loo maqumrhu ayakuphonononga ingxelo yonyaka ye-MDDA.

Abazuzi kunye nohlobo lwenkxaso:

Abona bazuzi baphambili benkxaso eya nkqo nengayi nkqo, iyakuba ziinkonzo zosasazo zabahlali, ndawonye neenkonzo ezincinane zorhwebo, ezibandakanya oonomathotholo, ithelevijini kunye neenkonzo zosasazo zoshicilelo nezintsha. Kuyakugxininiswa ngokukodwa kwiiprowujekthi ezizisa abahlali namacandelo adlelwa indlala – ngakumbi amakhosikazi, abantu basezilalini, abakhubazekileyo, abantu abangakwaziyo ukubhala nokufunda, abasebenzi kunye nabantu abangamahlwempu – kwicandelo lenkcazelo nonxibelelwano.

Uhlobo lwenkxaso iyakuba lolwemali, nolungelo lwemali, kwaye luyakubandakanya uncediso oluya nkqo nolungayi nkqo lwesabhsidi; inkxaso-mali yongxamiseko, uphuhliso lwamandla okwenza izinto; uqeqesho; ukuvavanya iprowujekthi kunye nophando kwiinkonzo zosasazo. Kwakhona iyakwenza iziphakamiso zokuxhasa iinkonzo zosasazo ezifuna imali-mboleko, ngokusekelwe kwiinkqubo zayo zokuvavanya.

Ummiselo oyakukhokela i-MDDA ekwenzeni izigqibo zenkxaso-mali kunye neziphakamiso zemali-mboleko iyakuba ligalelo elenziwa ziiprowujekthi kuphuhliso nokuphangalala kweenkonzo zosasazo. Iyakuzama ukuphakamisa ukuzinziseka kunye nokunika inkxaso-mali kwiiprowujekthi ezineenkqubo zolawulo ezifanelekileyo. Ezinye izinto eziyakuqwalaselwa zibandakanya ukuthabatha inxaxheba kwabahlali kunye nezicwangciso zolingano.

Ibhajethi ye-MDDA:

I-MDDA idinga imali eyaneleyo ukuze ifezekise iindleko zokunxulumana, ezoqeqesho, iindleko zezinto kunye nezokusebenza, ndawonye nophando lokufaneleka kunye nokuvavanywa kweiprowujekthi. Kwakhona, iyakuthumela ukwenziwa kophando kuphuhliso nokuphangalala kweenkonzo zosasazo. Iimfuno zayo zokusebenza, kubandakanywa ukuvavanywa kokusebenza kweiprowujethi, kufanele zingagqithi kwi 12% yeendleko zizonke.

Izinto eziyimfuneko ukuze kujongwane nentsilelo yamsinyane zifikelela kwi R256m zizonke, kwisithuba seminyaka emihlanu.

Urhulumente uzakuqale agalele isibini esithathwini (two thirds) sebhajethi, lona ishishini leenkonzozosasazoliyakugalela esinye isithathu. Makuqatshelwe ukuba igalelo likarhulumente liyakubandakanya inkxaso yobuxhakaxhaka boonomathotholo babahlali kunye nophuhliso lweenkqubo, esele inikwa ngokweSebe loNxibelelwano; ndawonye nezinye izinto eziphuma kwiimali zoburhulumente kunye nentsebenziswano ecwangcisiweyo nezinye ii-arhente ezifana ne-Universal Service Agency.